

Powšitkowne WOZJEWJENJA

njedźelu, 21. decembra 2014

Přiležnosć k swjatej spowědži w Róžeńće

Poslednja składnosć k swjatej spowědži do hód w Róžeńće budže wutoru, 23. decembra, wot 18.30 do 19.30 hodź. Spowědnicy budu pola fararjo M. Anders, G. Wornar, B. Jakubaš a kapłan O. Gonda.

Koparski turněr wo pokal TCM

Towarstwo Cyrila a Metoda z.t. (TCM) zarjaduje sobotu, 10. januara, w 14.00 hodź. w Chróšćanskej „Jednoće“ halowy koparski turněr wo pokal TCM. Přeprošene su wosadne a wjesne mustwa młodžiny kaž tež mustwa sportowych jednotkow. Kóžde mustwo měło z wosom hrajerjemi nastupić. Hrač budže so z třomi koparjemi a jednym wrotarjom. Přizjewić měli so mustwa hač do srjedy, 7. januara, pola předsydy TCM Jurja Špitanka, telefonowe čisło (03 57 96) 9 63 47 abo mobilnje pod (01 72) 7 97 38 29.

Hodowny hudźbny nyšpor w Róžeńće

Chór Lipa wuhotuje njedźelu, 28. hodownika, w 17 hodź. w Róžeńčanskej cyrkwi hodowny hudźbny nyšpor. Na nim zaklinča hodowne spěwy serbskich a němskich komponistow. Zběrka při durjach budže za hnadownu cyrkej. Wšitcy lubowarjo hodownych zynkow su wutrobnje přeprošeni.

Oratorij „Zyma“ zaklinči w Budyšinje

Chór a orchester Serbskeho ludoweho ansambla (SLA), Radworski chór Meja kaž tež solisća pod nawodom Gabriela Doná předstaja njedźelu, 28. decembra, w 17 hodź. oratorij „Zyma“ w Budyskej cyrkwi Našeje lubeje Knjenje. Tuta twórba je posledni dźěl cyklusa „Počasy“ z pjera Handrija Zejlerja a Korle Awgusta Kocora. Solistiske dźěle přewozmu Elmira Yakhina, Tanja Donatec, Mikołaj Walerych a Jae-Hyung Cho. Za wudawki koncerta přewjedže so při durjach zběrka. Wšitcy zbliska a zdaleka su wutrobnje přeprošeni.

Pobožnosć jako džak a próstwa w Róžeńće

Towarstwo „Naša Knjeni na Lipje z.t.“ přeprošuje wšitkich česćowarjow Róžeńčanskeje swjateje Marije wutrobnje na pobožnosć jako džak a próstwu kaž tež wo zastupnistwo při Božim trónje wutoru, 30. decembra, po wječornej Božej mši. Kemše su we 18 hodź. w Róžeńčanskej swjatnicy. Na pobožnosći modla so w naležnosćach towarstwa, ale tež w swójskich naležnosćach a serbskeho ludu.

Ralbičanscy pozawnisća wobrubja Božu mšu w Róžeńće

Na druhim hodownym swjatym dnu pjatk, 26. decembra, wobrubja Ralbičanscy pozawnisća Božu mšu w 9 hodź. w Róžeńčanskej cyrkwi. Woni zahraja někotre serbske hodowne spěwy kaž tež mjezynarodne instrumentalne twórby. Zdobom přewodžeja spěwanje kěrlušow.

Pišćelowy nyšpor silwester w Baćonju

„Wšo w Božim mjenje spočinam a w Božim mjenje dočinjam“ – takle chcemy Knjezowe lěto 2014 zakónčić. K tomu přeprašujemy wšitkich wutrobnje na pišćelowy nyšpor srjedu, 31. hodownika, w 19 hodž. do Baćońskeje cyrkweje. Rjad twórbow zahraje k roz-pominanju cyrkwinski hudźbny direktor Friedemann Böhme z Budyšina.

Baćońska wosada

Hodownej koncertaj w Radworju

Swojej hodownej koncertaj wuhotuje chór Meja sobotu, 3. januara, dwójce w Radwor-skim hosćencu „Meja“. W lětušim programje su hodowne spěwy runje tak zapřijate kaž wšelake „stare“ ze 120lětnych stawiznow chóra. Prěni koncert w swětle swěćkow budže w 15.30 hodž. Swačina so wot 15 hodž. poskići. Dalši koncert wuhotuje so w 19 hodž. Přizamknu so reje. Wšitcy su wutrobnje do Radworja přeprašeni.

Hodowny koncert w Chróścicach

Tradicionelny hodowny koncert Chróścanskeho cyrkwinskeho chóra z instrumenta-listami a solistami wotměje so njedzeli, 4. januara, w 14 hodž. w tamnišej wosadneje cyrkwi. Zaklinči mjez druhim „Missa pastoralis“ wot Ignaza Reimanna. Wšitcy su wutrobnje přeprašeni.

Lětny swjedzeń Bratrowstwa z premjeru bajki „Sněžna kralowna“

Kulowske towarstwo Bratrowstwo změje swój lětny swjedzeń sobotu, 10. januara, w 19 hodž. w kulturnym domje w Sulšecach. Na nim předstaji. džěcaca džiwadłowa skupina Bratrowstwa premjeru bajki „Sněžna kralowna“. Dale zahraja dorosceni džiwadłoweje skupiny někotre skeče a młodostni pokazaja nazwučowane reje.

Mandźelske seminary 2015

Termíny mandźelskich seminarow w Smochčanskim Domje biskopa Bena za přichodne lěto su 20./21. februara, 13./14. měrca a 27./28. nowembra. Přizjewić měli so zajimcy pisomnje hač do pónđzele, 26. januara, pola Dekanatneho dušepastyrstwa, Młynski puć 4, we 01920 Worklecach. Formulary k tomu móža sej w cyrkwjach sobu wzać.

Dźěłarnja za zbrašenych pyta noweho nawodu

Klášter Marijina Hwězda pyta za swój Dom swjateho Michała, dźěłarnju za zbrašenych, w Pančicach-Kukowje noweho nawodu. Wobšěrne wupisanje je pod www.posol.de wozjewjene. Nadrobnosće zhonja zajimcy tež pod telefonowym čisłom (03 57 96) 9 94 63.